



聖宋名賢五百家播芳大全文粹卷四十九

賀啟

賀沈參政啟

汪彥章

光膺書贊入秉事樞朝廷無謀國之疑天下有得人
之慶音郵四達風采一新恭以某官碩學造微高
文行遠房喬警敏安危炯炯於胸中瀏向精忠邪正
惓惓於筆下暫付維揚之治俄深宣室之思連趨鋒
車遽參魁柄儒術果康於經濟善人斯得於統盟復

七世祖宗之基國須賢立極一時人物之選公為時
生某久辱眷知欣聞登用均苗憑之末尚託他年在
陶冶之中敢忘今日歲律晼晚巖廊靖深願為宗社
以自持常有神明之來相

賀李參政啟

張全真

伏審顯奉制函榮躋政路正人登用固知道之將行
善類傳聞殆欲喜而不寐恭惟慶慰伏以 參政議
高而慮審學博而造微納忠不暇於謀身嫉惡盖由

於稟性鑪錘烈燭莫摧百鍊之剛霜雪泛寒不改後
凋之操堂堂侍從之老赫赫蕃宣之勲凜難進之高
風鬱具瞻之輿論公道既闢天意乃回用汲黯於漢
庭淮南自定見夷吾於晉室江左何憂究觀宏規灼
見興運惟是上增隆於王德下博採於真才內銷姦
欺朋比之餘外戢跋扈飛揚之漸裁抑奔競督責苟
媮凡此數條諒闕深念某支離病骨臃腫弃才謬託
交承之私終虞責任之重蒙成矩矱固無假於施為

佚老江湖政有資於造化餘寒未艾機務方繁益調
苗鼎之宜佇正鈞衡之任區區欣頌實陪等夷
賀翟參政啟

張文饒

伏審顯頒詔綍榮貳政幾真賢奮庸寰海蒙福恭惟
慶慰伏以 某官神姿英偉識量清夷學推四海之
宗工德茂三朝之元老再掛冠於神武尤高難繼之
風雨待詔於金鑿卒賴持顛之略遂由公望入踐政
塗論說無凝沛若巨魚之縱壑姦邪不起凜如猛獸

之在山坐制天驕允資人傑亟贊元於鼎鉉竚紀績
於旂常某蕭然衰蹤託此巨陰念備負於高密實陪
賓客之餘茲假守於會稽獲奉教條之舊未貽吏議
殆匪人謀除目播於邇遐離心陪於夷等計安宗社
側聞惟幄之籌佚老山林終借齒牙之論屬拘符竹
阻造賓閣

賀曾參政啟

王弱翁

光膺制綍參秉政機帝曰往哉文武為萬邦之憲天

其或者太平當今日之期郵傳四傳與頌交慶恭惟
某官博大而氣正浚明而識高宗論絃議鏗錡乎
闕庭雄篇大冊橫絕乎今古銀臺三昧簪廊廟之高
風金帶萬釘映山川之秀氣攘袂徇國秉羽投兵裴
度躬往視師遂決淮西之勝謝安晏息清寇果收肥
水之功識乙陛之履聲付上流之間制肆從圭覲益
峻巖瞻精神折千里之衝競業贊萬機之務有如春
注爰契疇咨惟茲四人共迪文王之彛教式是百辟

要觀山甫之令儀某內愧迂疎仰崇知遇乞漿得酒
適幸際於豐年點礫成金實全資於良藥遯聞異數
喜倍常倫陳泰階之六符莫親光耀轉洪鈞之一氣
終賴陶成夏律清和政塗間塗願謹鼎茵之節永為
宗社之休
賀揚參政啟
伏審延登帝賚參東國均大老既歸天下安往有德
是進朝廷益尊休聲不約而皆同和氣非召而自至

惟皇家之建輔自乾德之裁儀共領朝班纔差丞相
之一等通釐省務非特尚書之萬機雖大政之咨未
嘗乏其人然真儒之用或有愧於古必成千一之遇
如伊尹萊朱見而知烏庶幾五三之隆雖管仲晏子
不足為也恭惟參政心潛百聖氣塞二儀學者仰
如泰山早擢南宮之首蒼生望為霖雨久期西蜀之
來屬親攬於政機亟進聯於法從佩龍淵之錫既引
上於星辰演鼇禁之論更助為於雲漢上方慕仁者

交鄰而得湯文之道成功臣任職而全寇鄧之勲內
彊百世之本支外定四方之綱紀匪資者德孰贊
謨果躋寅亮之聯用究弼諧之業如范丹陽權人謀
於慶曆之際若王臨川持高論於熙寧之初已素協
於巖瞻宜即膺於柄用某逖將使指竦聽制音但竊
欣於得輿莫趨慶於成履願契沉幾之運益恢遠馭
之圖

賀洪參政啟代

伏審簡隆嗣聖序陟宗工冢席方虛宜總廟堂之議
邊烽既息併顓惟惺之謀播告遐遐聳動觀聽竊以
弥綸大政一日至於萬機體貌近司四岳均於百揆
或偶虛於袞職則獨決於廟謨是故韓安國長烏府
而行丞相之權郭待舉貳鸞臺而典中書之務參稽
故實委任真賢恭惟參政樞密知院驚代鍾才際
天蘊識學通流略而洞窺萬古文類盤詰而勒成一
家蚤擢異科薦敷華貫膺堯舜父子之眷如彼其專

較伊呂伯仲之優於斯為盛鼇禁久資於視草鴻樞
更藉於運籌果副民瞻進參國秉使已通於沙漠盜
既掃於潢池清廟告功盡出真儒之略正衙宣制佇
登元宰之班某猥冒使華尚需官次逖間成命喜陶
治之方新退省孤蹤覺悒悒之有託

賀陳參政啟

孫逢辰

伏審誕膺顯冊進服迓僚帝賚良弼而挺生王佐之
才天降大任而參秉國成之重茲一德明良之會實

千齡旦暮之遙恭惟某官學洞天久精祲之原德
合言行樞機之要踐揚茲久譽處深休肆疇論思潤
色之工進陟經體贊元之任儀刑四海出納萬微正
闡帝圖大釐邦采迨茲期月興王者不世之仁奚俟
百年著善人為邦之効某門牆舊物畎畝餘生猥當
三省起發之初嘗玷一諾游談之助逖聞休命爵躍
固異常人之情竊仰高風鳧趨莫陪下士之列竊
賀蔣參政啟
孫逢辰

伏審祇奉璽書進司國柄方賢路逢辰之日政聖心
籲俊之初揆群策以圖勲大張天步進真儒之置輔
卓冠臣宗恭惟某官七葉忠孝之門四科文學之
士一朝獨步兩禁先登體聖人之清而使貪夫廉秉
君子之剛而使枉者直光被贊元之舉具宣扶世之
猷自古稱君臣千載遇合之難於今見祖孫五紀蟬
聯之盛近繼元符樞筦三事之列遠追東京山亭萬
戶之封恭惟馬氏白眉之良行踐王公黑頭之拜如

某者年歲遲暮名迹湮淪同鄉社纔數舍之遙在門
墻無半面之素繫巨川之舟楫何所不容而夏屋之
悒悒固無弗獲側聆誕告尤激歡悰曳鄒衍之裾無
因至前著祖述之鞭忽焉在後其為抃躍固罄古陳
士一醉賀王參政啟
顯對廷揚登陪國論旒黉益勤於簡注簪裾聳企於
儀刑勢在本朝威宣遐域恭惟某官斯文所在以
道而鳴蘊誠明之學而本乎中庸操經綸之志而見

於事業真儒無與其敵岷然在諸公之前天子盡用
其言擢之真七人之上薦紆密暭進副師謀惟其當
君子大有為之時必能辦羣臣不可及之事師尹赫
赫已具隆巖石之瞻齊人章章將盡歸侵疆之舊倚
席鈞衡之寵懋成彛鼎之勳某辱在下風遠從漕役
今頃與諸生之列故喜倍常人之情若曰知音政流
水高山之際如其造化在春風夏雨之中

賀蔣參政啟

對揚宸綍崇貳政機進有德而朝廷姦邪敢侮得賢者而邦基立太平可期華夏罔不交驩士民率皆相賀竊以柄輔一象佐斗極以建時秦階六符應文昌而辨位仰瞻乾度俯驗人謀蓋將參造化於陶鈞贊編綸於天地唐宗圖任登庸首命於魏公藝祖用賢遴選特先於居正矧宣王復古之際委吉甫作相之初易俗移風方冀修明於教化施仁發政力圖安靖於寰區以至理財用以濟中興明黜陟以勵庶尹考

禮定樂折獄明刑自非公選於賢良曷足參知於機務苟求羣彥果得巨人恭惟某官挾經文緯武之才負聳壑昂霄之志道德純備器宇端方玉樹瓊枝迥出風塵之表珠衡犀角允懷冰雪之清其高識遠見足以發明於斯人其博物洽聞足以可信於往古青雲得路搏九萬里之扶搖黑髮重金盛一千齡之際遇頃從近列浸歷華塗飛騰省闈之間參摠樞機之要名既與身而俱顯德當偕位以兼隆遂簡上心

亟參大政方覩絲綸之渙號已聞朝野之歸心竚正
台衡即司槐鼎均調元氣永底丕平某跼促轅駒翱
翔蓬翼頃幸同於官守常獲款於歡娛茲聞進拜之
榮但切欣愉之至某偶拘郡紱阻造賓閔紆想一堂
共慶風雲之會輒憑雙鯉聊伸燕雀之私
賀席參政啟

張全真

仰膺綸制入秉政機槐位久虛蓋簡求於宿望巖瞻
既峻實大穆於師言欣圖任之得人知治安之有日

竊以車馬自南巡之後廟堂深北顧之憂一人嘗膽
而念寇讎羣公借箸而決成敗閱時滋久至計未聞
欲陵厲中原而復土疆則敵勢尚強蓋懲車覆之戒
欲逡巡江左而聽天命則國威日損或有陵夷之憂
當宁雖屢興嗟盈庭莫執其咎豈中興之業難以速
於得志而非常之事未可輕以屬人故茲黃閭之開
宜慰蒼生之望非時英傑孰副倚毗恭惟參政厚
德鎮浮大猷經遠想累朝之故老綽有典刑閱當代

之名流蔚為領袖雍容禁從密勿忠嘉果膺黼衣之
知擢贊鈞衡之任方當協成長策宏濟多艱力王室
而復神州少快茂弘之志修政事而攘夷狄載賡山
甫之章某比以病衰託於輝潤南臺兗豸蚤欣草木
臭味之同西省賜環尤其松柏歲寒之操辱知固久
歸老有期逖聞除命之頒切倍常情之喜

賀楊參政啟

蔽自宸衷參持宰柄天降大任歷三朝而後興志在

斯民委萬務而不厭絲綸誕布廟廊增崇竊惟同以
為和鄙夫昔以充位周而不比賢者今以致君當乾
剛獨斷之辰襲泰吉彙征之後羣枉絕去大公顯行
有若于陳十年而無咈庶幾丙魏一體以相成坐臻
休功可謂盛事恭惟某官學闕治忽道貫隆污蚤
極羣書蔚為多士之冠晚凝庶績雅屬萬民之瞻方
退避於險微久自全於明哲日月並照江湖來歸論
思禁闥則諒直之志宣潤色皇猷則灑噩之詞著當

宁目以重器在廷仰其達尊果繇喉舌之司遂奉股肱之寄公權素行不數日以移風伯起名家當四世而載德某濫分外閫方託洪鈞眷索同趨尚想金華之對搢紳相慶莫陪沙路之塵永言傾瞻實倍倫等

賀錢參政啟

伏審寵頒命冊褒進宗工陪鉉席之贊元官儀既正併機廷之機武國勢增隆朝野交歡華夷咸賴竊以文武二柄並用惟久明良一體相須乃成方類穆於

政經更外清於戎索苟非傑異曷副疇咨恭惟參政樞密知院曠代充才際天蘊識發蹤指示嘗顯幕府之權謨明弼諧方贊廟堂之畫師干所指騎塹俄清宜應泰階之六符纔差丞相之一等昔天聖內翰竟不陞二府之聯而乾興元樞未嘗預三省之政茲已光於先正矧即拜於上台由階而升可供以俟某夙叨臨遣行代還上策禦戎將見五兵之戢大鈞播物尚霑四牡之來

賀王參政啟

熊子復

伏審輟營邊瑣擢替廟謨長爭臣之七人久隆上眷
差丞相之一等進繫民瞻體貌方新陛庶增重竊以
河北甫定胡文烈遂參於政機陝西略平龐莊敏亦
貳於國秉茲本朝之盛事皆當代之偉人經營雖見
於長才論諫未聞於大節求之先正無若范公明道
立朝罄危言而悟主慶曆奉使攄妙略以禦戎及
朝寵進之崇故四海恨用之晚曠古今而僅有邈前

後以相望恭惟參政直道儀朝遠猷經世夙被光
堯之眷薦膺分陝之權班旣列於從塗簡益堅於嗣
聖參華計省無錢穀之問至廟堂振藻詞林有書札
之文賜方國逮甄流品更揔銓曹旋陞正諫之職出
護安邊之帥內清朝序姦邪讒佞欺負皆已除外壯
軍容障戍鎮守干戈果自治亟垂睿想還翊化鈞方
今使雖遣而威靈未宣敵尚窺而要領未得雖和親
征伐但歸兩科而輔贊彌縫要藏諸用願進顯於魁

柄用光啟於洪圖某猥戒輕軺阻趨崇初仰窺勝算
喜根本之既彊退省孤縱覺併蒙之有託
光奉制書進陪國論樞庭獨步方承晝日三接之光
政路同寅已動泰階六符之色人心闡澤海宇清明
恭以某官靜和而粹夷宏深而簡遠度量包世地
負海涵道德照人日光玉潔爰膺妙柬出應昌期正
謀邊瑣之虞果預使疆之選深為國計帳三表五餌

之不施逆料虜情知十餅九漿之可下用權活法密
贊沉幾大計定而主聽不搖佳兵寢而民生自厚惟
其純用詩書之力所以優為道德之彊既得其人宜
委以國稽治道之極致必在華夏蠻貊之舉安考仕
塗之甚榮罕見父子兄弟之迭起邊陲靜謐門宇熒
煌自非內百姓而外四夷何以身美名而君顯號旂
常有紀天地無窮某竊伏冗僚欣聞異數屬宣帝綜
核庶政常憂稱職之未能若周公阜成兆民願繼考

工而有作
賀施參政啟

眷求舊德允諧選衆之公參豫政機式賴同心之助
側聞休命倍集懽驚竊以六符位於泰階雖正公台
之象四輔拱於北極亦分政弼之司蓋機務之浩煩
繫謀謨之協濟必有恢廓老成之士共圖光明俊偉
之功用簡清衷宜歸雅望恭惟某官道躋民極業
揔天常沉毅剛方有東都之氣節溫恭忠厚擅西漢

之文章入踐華聯益騰茂實揔銓衡之選授咸仰題
評贊鈞軸之陶甄果諧登進必將盡行其所學遂以
大慰於斯民增貴昌期茂隆遠業某孤蹤不振弱植
無依假守縉雲曾賴吉新之益遡風蜀道欣聞圖舊
之良慶謁未遑瞻依再劇

賀葉知院啟

伏審外奏膚功中疏顯渥乃眷樞機之元德夙資惟
幄之深謀宜腆褒章用光成績惟聖賢之會遇極簡

策之尊榮慶動縉紳威加夷虜恭惟賀樞密知院師
表當世弼亮熙朝發揮孔孟之精微振起皋夔之事
業內昭王度百志所以惟熙外暢天聲九鼎為之增
重惟涅中之新境實隴右之故封物產夥繁地居險
阨武帝遂通三十六國之遠素號喉襟充國請糴數
百萬斛於茲可知沃壤歷代守之以制虜名將繇是
而折衝神考御天不忘恢復恭陵繼志乃克綏懷紛
異意以中更舉成功而外棄神蓄亡胡之憤人懷歸

漢之恩載軫淵衷式資碩輔灼見萬全之策亟收一
舉之功壺漿在途牛馬布野歸實同於縱壑勢蓋易
於建瓴用能旬月之間盡復犬羊之衆近觀鄯虜已
知係頸之期旁瞰夏巢無復遊魂之計再收妙略增
賁昌期宜薦錫于寵光用益昭於賢業某夙蒙異寵
久負空餐乘障荷戈不預虎貔之列策勲飲至莫陪
鴛鷺之群側聽詔除阻修賓謁雖慙弱植倍極歡悰

賀胡參政除知院啟

恭審朝敬顯冊位正元樞得君如彼其專既有以答
諸大夫之望在廷無出其右是宜政居三執政之先
國勢尊安戎心震疊恭惟知院樞密相公發大道
於不傳之妙振斯文於將墜之時泰山喬嶽之尊挺
然特立和風慶雲之瑞溫乎可知繇壽皇特遺於
嗣皇自禁路亟登於政路精會神聚見於都俞吁咈
之間謨明弼諧藏其輔贊彌縫之用久疇咨於左轄
遂升冠於右廷逆揣上心實關至慮與其差丞相

之一等政機收修輔之功孰若幹天樞之萬方道德
有威強之效雖甲兵之問久已不至然疆場之事當
戒不虞有道而守四夷天子方恢於遠馭運籌而勝
千里明公盍繼於前良人所共期時亦易失蚤建非
常之間旋膺爰立之求某十載門墻一麾江海託萬
間之廣廈倍有歡欣搏一氣之洪鈞敢希造命

賀汪知院啟代

熊子復

伏審趣還舊弼寵正元樞單于叩五原方舉衣裳之

賜子房冠三侏允顛惟幄之籌魁柄有歸巖廊增重
竊以儒用真焉得削則制挺可撻夫甲兵士遭變
不知且則解圍空舞夫干戚是故有富文忠之遠略
而契丹之和乃定有龐莊敏之長算而元昊之款遂
堅皆決勝於機廷繼登庸于揆席玩四夷猶兒戲爾
曷敢不來想二公若聖人然詎容專美恭惟樞密
知院學關百聖道契兩朝長御史以視師夙定禦戎
之策參天子而議政亟恢經世之圖中雖迫于流言

上愈隆于注意起思管籥兼蒙福于京師入覲冕旒
果基命于宥密既首本兵之重仍虛元宰之尊異域
申盟聊用疆于戎索正衙宣制佇遂秉于國鈞某猥
使遠方喜聞新命帝王之興建輔弼寔有賴于共功
國家之暇明政刑要不忘于自治願彌縫而藏用副
垂拱而仰成

賀虞知院啟

宋仲山

伏審誕敷綸制入典樞機惟幄莫重於本兵謨謀必

資於緯武威加夷夏慶動縉紳恭惟
樞密知院器識光時才猷適變道德之學洞照於幾微忠讜之風
聳聞于朝野中罹讒謗旋陟邃巖居多入告之嘉猷
益挺不回之勁節果符輿頌進服巖廊深觀竒偉之
功增賁明昌之運某久塵委使素辱知憐
中書平賀虞知院啟
洪景玉

伏審帝懷舊弼國拜元樞乾坤清夷久息干戈之役
夙夜宥密首當帷幄之籌播告邇遐竦動觀聽竊以

交鄰有道本聖主之洪摹制勝無形賴真儒之竒策
矧是機廷之長寔均揆席之尊方嗣皇獨運於朝剛
非耆哲孰專於廟算恭惟樞密知院道關百聖功
蓋兩朝持正論如執玉之堅斷大謀若轉圜之易即
江中而破虜勝謝元淝水之勳臨漢上以揔戎過羊
祜峴山之績逮進陪於鈞軸仍兼運於韜鈴果致要
荒再尋明誓方具瞻於巖石俄勇退於急流亟興丹
宸之思復佐清朝之治暫本兵柄績成偃伯之休旋

秉國鈞茂建格天之業某猥乘輶傳述望泰符茲聞
成命之頒實陪尋常之喜萬間廣廈幸已託於悒懽
一氣洪鈞願永陶於塊土

賀富副樞啟

孫仲益

茂膺帝訓進貳樞庭既登奕世之賢蓋重本兵之地
恭惟某官挺祖風烈為世英豪久隆佐國之謀實
副象賢之氣氣折強虜惟先正茂鼎彝之勲志在安
邦資沉幾運帷幄之議繼家聲之烜赫極國步於艱

難是宜宥宥一堂折衝千里王威敷暢永無內侮之
侵凌士氣激昂庶盡殊鄰之俶擾某謬膺郡寄欣覩
綸言三幅八行曷罄書辭之悃九州四海用慶朝廷
之尊

賀王副樞啟

孫仲益

伏審帝夢發祥上心虛竚誕膺顯冊進貳中樞竊以
章句之儒類優柔而不武介胄之士亦椎鈍而少文
蓋藝之至不兩能惟天所賦有偏得惟是文武憲邦

之任實符宥密基命之求端委一堂折衝萬里論兵
投筆之後賦詩橫梁之間制挺捷強秦之兵請纓繫
單于之頸用宣威於道德式注意于安危恭惟樞
密躬不世出之才佐大有為之治論詩書於馬上方
草奏篇得頗收於禁中遂司密命盡古今不可兼之
美值聖賢所難遇之時廷號初傳巖瞻惟允厭未形
之難坐籌玉帳之竒建非常之功行佇袞衣之拜某
聞命而喜固異常情受知之深實契榮願致小夫竿

牘之禮或以為煩懷大臣教載之恩不能自已

賀鄧副樞啟

晁之道

伏審光被宸綸榮參樞柄聖神圖治痛宗社之多艱
賢哲奮庸覺朝廷之增重恭惟某官天資高邁風
度粹夷學擅名家極羣書之浩博文高華國掩衆作
之深醇蚤冠英躔薦更劇任嘉謀偉器進當旒宸之
知素履清名允協簪紳之論果膺妙簡遂贊洪機端
委廟堂而為準於百僚已歸重望運籌帷幄而決勝

於千里竚紀殊勲某頃獲接於清規茲復依於巨蔭
行借游談之助俾從佚老之歸草木亦知威名會見
折筮以制羗胡之命黍稷以供餘稅固將擊壤以追
田父之歌屬拘職於印章敢投誠於竿牘方隆倚注
益輔粹和

賀林副樞啟

伏審顯拜宸恩參陪機柄惟是本兵之地必資同志
之良凡與交從尤深慰懼伏惟 某官秉心直諒毓

質淵源學造古人之全名收天下之重歷典藩要漸
躋禁林選掄初自於先朝圖任益隆於嗣聖矧中樞
之宥密首近位之論思文武道同仰助璿璣之運雨
暘時若共臻玉燭之和某素接班聯久欽德誼不獨
士林之屬望固惟朝家之得賢驩欣之誠悃悞難叙

賀蔣副樞啟

唐子西

誕敷明命擢貳鴻樞世稔服於重名人共欣於顯拜
恭惟 某官才高康濟志切經綸文章秀發於妙齡

器業養成於晚節中外薦更之久所守益完縱橫應
變之材無施不可出而頗收入則卿雲先帝深知欲
大用而未果嗣皇優眷遂圖任而無疑名還自外而
歸直禁林曾未閱時而延登右府參裁機政寧牧邦
猷朝朝取決於坐籌邊鄙折衝於燕俎君臣千載孰
窺造膝之謀冠帶百蠻行見止戈之武某側聞除目
阻遠鈞嚴莫申賀履之私永愧登門之舊

賀趙副樞啟

秦少游

光膺眷命進貳鴻樞伏惟慶慰恭以某官器猷宏
博學術精微敏識照於未然竒節見於已試犯顏逆
耳屢輸汲黯之忠別嫌明疑力折董宏之妄進退周
旋而可度艱難險阻而不渝俄被召以旋歸遽干霄
而直上粵自卿曹之貳進陪樞筦之崇邸音播騰士
論欣快亟聞趙武越四等以將士軍行見千秋以一
言而取宰相某叨分符節云云

賀沈副樞啟

許次思

宸綸播命宥地登庸巖廟益尊增煥斗牛之野蠻夷
震疊懼騰貔虎之師允涖芘庥孰不歌舞一某官才
高經緯識造幾微傳聖人之道而期於力行通當世
之務以為於已任無蚍蜉蟻子之援歷鈞天帝所之
遊貳事者聯制邦財於強富修辭史館納王法於婉
微成績炳然貴名籍甚以文武兼資之器會君臣一
得之符爰進貳於國樞遂密參於廟算方聖主大有
為之日實上臣恢遠略之秋必將衆建時髦兼收群

策指縱諸將坐成第一之勲紀石燕然共際千之
運即正金甌之拜永調玉燭之和某乘部無堪登門
有舊馳心大厦莫攄燕雀之私投翼深林庶遂鶴鶴
之許

賀陳同知啟

伏審輟總銓平摧躋樞近邊烽久息益恢宥密之圖
宰府初開併贊經綸之務郵傳四出廟論一新竊以
帝王輔弼之臣要須並建文武弛張之道允屬兼資

方顯戎索之疆更貳國鈞之康卓為異數併授真賢
恭惟以樞密同知參政氣勁而量闊體冲而韻粹勝
登龍虎甲四海之諸儒履上星辰冠六聯之常伯况
長策蚤施於邊瑣而遠圖密契於宸旒朝廷推德業
之尊將帥仰威名之重果膺命冊進筦事樞舜有五
臣伯益贊舞干之化漢用三傑子房專籌帷之功屬
綜核於羣工兼彌繼於庶政參百揆四岳之列既任
弼諧應三台六府之躔佇當燮理某叨居省闈獲備

官寮茲承新渥之除實倍羣情之喜仰窺妙算諒開
闔之難名退省孤蹤覺帡幪之有託

本隊師賀劉同知啟

伏審簡自九宸柄于二府摛文內禁久已預於密謀
績武中樞進遂當於大任郵傳四出廟算一新竊以
舞干戚而解圍蓋元是理籌帷而決勝必有當才
矧參翊於神機宜妙籌於邦傑若章文簡拜於景祐
之際如吳正肅命於慶曆之間進皆自於鑿坡秀仍

鍾於建水雖今僅見振古罕聞恭惟樞密同知道
際兩朝功傳三世得龜禁之頗牧頌殿藩宣趨鳳沼
之夔龍復躋華要果顛兵柄遂陟政塗摠攬權綱事
雖由於獨斷運動樞極時正賴於同寅某幸託餘輝
欣傳異渥道古今而譽盛德敢効私諛進英雋以彊
本朝願符衆望

賀林同知啟

劉子駒

伏審光膺制命榮贊樞庭凡被鈞陶率同鼓舞恭惟

某官嘉謀經國粹行表時文章究六藝之淵源問
望聳一朝之風采貫古問學該今典常依日月之光
華乘雲龍之亨會國是既定民瞻益深果由喉舌之
司進陟樞機之任綏禦每資於長算猷為豈屑於近
功金石著勲彛常紀德聊居右府即踐中台某辱知
己之既深輒忘言而申序方棲仁蔭徒深燕賀之誠
莫展慶儀不預鳧趨之列載惟抃詠曷既敷宣

賀葉同知啟

孫正之

伏審對揚休命入秉事樞聖主御圖撫九五中興之
運大賢命世偕二三同德之臣廷渙甫傳巖瞻惟允
恭惟樞密同知訂謨經遠雅量鎮浮好直有叔向
之言養氣得孟軻之勇嬰龍鱗而摩上獨懷蹇蹇之
忠冠豸角而觸邪詎作容容之計萬夫之望想聞於
風采一國之慕具載於歌謠果膺帝輔之求式受本
兵之寄經術之士進而名器重道德之威立而朝廷
尊天子守四夷正樞筦運籌之日人主論一相示鈞

衡爰立之期某分為二紀之餘追惟一日之雅側聆
大用倍激懼悚繫四方人物之英舉欣欣起執鞭之
慕而一老門墻之舊已駸駸向填壑之時俯深賀燕
之私徒有羨魚之歎

賀張同知啟

林豈塵

寵膺策制擢貳樞庭國之將興眷直臣之在位人惟
求舊登元老以壯猷四方傳聞九鼎增重恭惟某
官擎天柱石許國著龜吾道以為指南斯文之所寄

命備更天下之故自結人主之知頃登要津即契真
宰會公孫方貴用事故長孺不得久留挺寒松之姿
而晚操弥堅馥秋蘭之馨而久幽不改惟瘠后闢簡
賢之路而清朝無嫉能之臣起我公齟齬未合之中
攄士夫鬱結不平之氣謂東宮之位宜早定尚何待
周昌之爭以累朝之君不欲言遂固有魏暮之請雖
咫尺被黜旒之寵然毫釐輕軒冕之榮丹墀暫輟於
咨諏琳館旋便於間燕屬重明之麗正圖者德以弼

諧首煩留鑰之司遽下召環之賜運機軸而九重密
賛坐帷幄而萬里折衝外朝衣冠覩絲綸而相賀窮
途鱗甲失匕箸以自驚亟登泰階兩兩之符式慰維
石巖巖之望某身縻遠嶠迹託洪鈞聆成命之載揚
知中興之可俟德尊黃髮當遂策尚父之元勳身伴
赤松未許學留侯之故事

聖宋名賢五百家播芳大全文粹卷四十九終

聖宋名賢五百家播芳大全文粹卷五十一
赤汗未乾學留刻之功事
味中興之何窮
心雖盡之望其平
並繼甲火之香以自
昔聖朝興
詩台

聖宋名賢五百家播芳大全文粹卷五十一
賀啟

賀虞簽書啟

熊子復

伏審召自輔藩擢于樞筦方天子振旅將巡于邊陲
宜人傑運籌決勝于帷幄師氣九倍虜情莫逃郵置
初傳道塗相慶竊以建隆之分宥府寔並都臺興國
之置簽書通為執政必陞華于祕殿以借重于機廷
昔聞典故之存今見老成之用恭惟之樞密才高一

代名震四夷羽扇綸巾却大敵笑談之易離戈錫盾
制上流經理之勞比屬多虞正資遠略雖作蕃于近
福亦蒙于京師必本柄于中命乃基于宥密果膺帝
簡越積神謨用儒雅章句而先武夫歷觀已試遣將
帥戎役而衛中國今仰成謀豈惟折千里之衝方將
建萬世之策某猥縻原隰阻拜門墻廟算不遺相契
沉機之運台衡有待倚需渙號之揚

聖宋賀王簽書啟

馬子才

渙號王庭對揚天子之命參謨樞府簡在上帝之心
聲名推重於朝廷華夏想聞其風采凡依德宇舉極
驩心竊惟樞柄之臣始自唐宗之制朱梁易之為崇
政石晉更以為宣徽分南院北院之稱有正使副使
之任名雖異政理寔同條迨我宋之隆興鑒前朝之
得失兼置簽書之職並為執政之官蓋將總御于藩
戎抑亦參詳于機密安危所係授受非輕自非才畧
兼優之人曷副聖神注委之意廣謀庶位果得宗工

恭惟 某官識造淵微窮學元本仰天庭而覩星辰
之小浮滄海而知江河之汙六藝折衷于仲尼萬事
不問于伯始仁經義緯蘊和順以積中玉振金聲致
英華之發外確爾自守介然不移其為氣也至剛有
諸己之謂信青雲得路搏九萬里之扶搖紫綬重金
際一千齡之會遇頃從近列浸陟華津振耳目於烏
臺聳威稜于風憲巍巍然泰山北斗無得踰焉凜凜
如烈日嚴霜真可畏也身既與名而俱顯功因得位

以彌昭爰辱眷知亟參樞要內以制于羣牧外以鎮
于四夷形勢強而王室尊賢能用而天下治綸言誕
布輿議允諧行慶九遷即登三事如某者么麼細行
連蹇浮生頃緣都下之游獲識荊州之面傾蓋如故
陳義甚高茲間台座而登庸竊偶藩符而出守潭潭
公府方欣仰託于悒懔六六錦鱗敢後欽修於竿牘

賀蔡開府啟

翟公英

視秩公槐增華將鉞官儀鴻尾共瞻黃閣之崇命數

蟬冠咸仰黑頭之拜傳聞四遠頌歎一詞昔者周公
之勲封伯禽于魯國康公維翰命名虎于淮夷然而
伯禽無預于成功名虎克承于先世猶且寫諸琬琰
播在聲詩豈有述作萃于一門事業煥乎當代朝廷
無出其右簡在帝心父子同升諸公貴窮人爵袞衣
焜耀而交映草履羗池而後先稽參舊聞曠絕無輩
恭惟相公身兼數品德範群倫方當強仕之年已
佇登庸之望曲臺容典潤色倚以告成東觀諸儒摠

領資其折衷迨茲顯拜誰曰不然某夙荷眷知獨傾
意氣七登三事願觀伯始之榮四世五公當繼諸素
之盛

賀蔡吏書啟

趙德莊

伏審益簡清衷晉疏華渚冠聯兩禁繼嘉祐之祖風
摠職四銓舉元豐之帝典輿情允穆瑰望愈隆竊以
八座貴而非賢莫居寔亞機衡之任六卿分而各率
其屬首嚴銓總之司惟已試之効則流品自分必久

次之英則號名乃正眷焉甚重允也才難恭惟
部尚書與學家傳懿文古作蚤膺妙注徧歷要途擢
貳版曹著元和之國計越居選部揚行險之能名果
遷常伯之尊益致本朝之重尚書之為喉舌寢具師
瞻執政之猶股肱佇顓國秉某猥恭漕指述聽除音
莫陪賓客之趨曷勝寤寐之喜

賀張吏部啟

任子淵

肅膺帝制進長天官參八座之高華領三銓之要劇

除音騰播公論忻愉竊以任法不若任人清議存而
風俗可變用賢無如用舊老成進則朝廷自尊矧維
四選之司寔冠六卿之職治源所出入弊相仍自非
一代之者英曷稱九流之宗主恭惟某官芳猷世
濟高韻天成早騰宇宙之名峻陟雲霄之路致身九
陛言正大以無私去國十年氣方剛而不撓頃從留
鑰亟奉賜環冕旒渴見于儀刑紳紱想聞于風采謂
正人之見用斯治世之可期宣室詳延奚止賈生之

辯東山堅卧肯容謝傅之高得時則行何志不以趣
勸路門之講聊從真館之游旋被湛恩復還舊物官
稱在昔是為冢宰之尊帝眷于今必倚宗臣之重即
登三事以器百工某年顏寢衰志氣益落念報國之
無補欲歸田而無能拭目以觀喜用鄉人之善彈冠
何敢惟求老者之安

賀王吏書啟

李粹伯

召還瑣闥資論馭之清規擢進銓曹付品題之重柄

一紆印綬萬集簪纓定權稱于胷中運甄陶于筆下
屬叨英盼倍切懽悰恭以德量涵空神鋒脫穎坐
仙山而直鈞掣盡六鼇望阿閣以來巢壓低三鳳白
眉難辨赤汗俱高雍容方躡于禁林簡拔即登于法
從旋聞授鉞出試偃藩保釐未著于東郊疆理先周
于南海龍韜寢遠虎帳屢移輟溫洛之除書分廣陵
之節帥席猶未煖車以戒行八鸞啣啣擁遄歸于山
甫四牡奕奕歌入覲于韓侯曷百僚鳴佩之音恢九

載望雲之意對揚文陛密契淵衷探公論之盈庭勞
巨儒之典選青錢學士聲華已茂于昔時黑頭尚書
班序正聯于今日涓清涇濁韶濩皆曲盡于見
聞終難欺于去取前馮裴而後盧李豈足擬倫左稷
高而右臯夔佇觀並列某久睽恩館窮處瘴鄉慙教
職之無功誤薦章之及格敢投知遇曲借生成瞻鶴
鵠之摩天莫攀迅翼起鸞鳩之控地全賴高風

賀溫吏書啟

王宣子

誕膺明制峻陟近班朝野交歡人神胥慶竊以周頒
六典首登太宰之官漢設四曹並建尚書之位魏崇
八座而名參乎僕射唐列三班而事領于宰臣蓋端
右之秘居寔殿中之峻秩布宣王命允為喉舌之司
綜核人材盡執銓衡之柄爰求碩德當賴宗工恭惟
某官元粹在躬泰寧得運夙被凝旒之睟蚤歸側
席之求昨東賓僚俶開王府擢在師儒之位進居保
傅之官逮聖德之日躋屬珍圖之神授風雲感會雨

露濡乾健御天已應飛龍之造晉明出地徐觀賜
馬之藩眷注愈深倚毗加厚監觀往謀考驗先猷商
美高宗念甘盤之舊學漢嘉成帝篤張禹之故恩果
奉褒俞亟參法從絳衣蒼珮典禮奉常青瑣黃扉居
中給事侍金華之經幄領玉府之書林僉謂該通衆
推博雅越從嚴日近日正浩穰惟千里之都畿示四
方之表則發姦摘伏賴廣漢之嚴明扶弱抑強孟
容之威望未周歲籥已奏功書遽陞常伯之崇仍冠

選曹之重士論惟允帝心所嘉進善拔賢共仰山濤
之識揚清激濁皆推毛玠之風佇奉絲綸入調鼎鼐
上紓遠業俯慰群情某章句陋儒斗筭賤役賀厦之
燕但切安巢之心在鈞之泥即歸造物之手

賀韓戶書啟

陸務觀

伏審祇奉峻除榮遷劇郡官儀如舊尚聯常伯之班
帝命惟新全摠大農之政有識交慶不謀同辭恭惟
戶部尚書才高絕人器大經世際熙辰之千載踐

華禁者十年夜艾星稀獨長庚之有爛歲寒木落惟
孤松之不凋蓋謀猷自簡于帝衷故遷擢式符于民
望陟文昌之八座聊率屬于中臺煥泰階之六符佇
同寅于上衮某符叨剖竹戍甫及瓜但切欣于得輿
莫趨慶于成廈仰止門墻之際形于寤寐之間頌歎
惟勤拙訥難盡

賀楊戶書啟

邵公濟

顯揚帝制進長地官惟八座之尊崇接二府之嚴近

士夫快見夷夏聳聞恭惟某官學際天人才兼文
武尚識三朝之故老獨為一代之偉人倫孔明保蜀
之功得夫子尊周之義令行千里之外法循三尺之
中強虜威服其威名遠民歌舞于善政妄言欲毀于
日月公心不動如邱山獨當聖主之知盡伐宵人之
計初解印綬即賜珮環上意方隆下情益附某官學
衰落身世沉浮猥以鄙文夙承異獎至自補于圉吏
若有愧于館人浮議盡消知謝傳之必起流言既辨

宜周公以來歸共欣正道之行寔為中興之兆

賀王禮書啟

陳君舉

伏審簡在嗣皇擢居常伯榮兼瑣闥既謀猷啟沃之
特親遽直鑿坡更號令文章之可述有識交頌不謀
同辭竊以世難得于全才人罕兼于數器而况搃舜
代夔龍之職擅漢廷賈馬之能挺出熙朝併當殊選
恭惟內相尚書妙宗道壺雄帥文壇早膺丹扆之
除久典紫垣之誥屬謀元帥維時得頗牧于禁中果

賢長城吾君置隴蜀于度外適茲多故正藉遠猷追
鋒促還側席虛竚儀成長樂諸侯羣臣皆肅恭制下
興元武夫悍卒亦感動命更資于審駁功益著于論
思某幸託餘輝欣傳異渥曳星辰之履高華已冠于
崇班紀月日之常久大方期于相業

賀傅禮書啟

汪彥章

先奉贊書進班常伯唯時改作須大儒專禮樂之司
以類俱升宜宿望次公台之任訓辭優寵班列清明

恭惟 某官厚德鎮浮高文行遠氣得古人之剛大
學兼天下之中庸自得位于朝廷即留心于人物力
加慰荐每推轂有味其言自處安恬或積薪後來者
上昨屬殊鄰之擾上貽當貯之憂唯公克念于生靈
無日不謀于宗社處雷霆之下密輸忠讜之惓惓揭
日月而行恥事功名之赫赫果膺眷命首付彝章舜
官尤重于秩宗漢爵莫榮于稷嗣將萬世維扶之是
賴何一時康濟之足言某久托餘光欣聞盛事方隨
之慶

賀孫兵書啟

周 邦

堯被十行夙被絲綸之渥漢家八座晉領紀綱之權
統武部之五兵行司馬之九伐協贊文昌之政望樓
目斷于天邊親遶廊廟之知拜命恩先于日午卓爾
不世出之佐應乎大人造之朝恭惟尚書兵部道義
高明智謀沉遠曾中學海可納禹貢之九河筆下詞

鋒能敵單于之萬騎養器識若七年之杞梓收功名
如一日之駢駟譽播青錢再冠詞科之選身遊紅藥
爭觀誥令之嚴恥將赤子以事戎夷獨發大忠而顧
社稷匈奴無事何勞竇氏之遠征華夏既寧果念曲
江之先識亟奉紫泥之詔進趨青瑣之班著兩朝謩
諤之聲冠百僚倚毗之厚駢膺眷眷峻陟夏官梁帝
之用明少選寔繫朝廷之重唐宗之擢令狐楚能消
軍國之姦數廣謀猷頓清綱轄青雲路繫已登六部

之尚書黃渥恩濃更擁重金之寶帶某濫綴門牆之
日久側聞除目而喜深慶九萬之程已鄰鳳沼嗟差
池之羽尚在雞羣簿書換文史之心篋庫供江山之
眼輒凭竿牘舒寫肺腸聖君儉朴以化民擾攬收六
合之豪傑我公忠純而致主定臻一祖之太平豈止
伏伽之作誼臣重見叔敖之為賢相薰風滿于舜綺
畏日永于義輪善護寢興前膺休寵

賀王兵書啟

張子韶

伏審疇庸東掖率屬南宮常伯寵優佩佳成之寶劍
司戎職暇偃太乙之靈棋鄰宰鉉以平躋冠從塗而
絕擬有識交頌不謀同辭竊以祈父王之爪牙周蓋
顯于九伐尚書帝之喉舌漢寔次于三公自開西府
以本兵第列南宮而分職然裕陵肇修官制猶虛位
于夏卿至哲廟搏采師虞始新除于邦傑尚贊萬機
之務蔚為千載之逢恭惟 判部尚書才備全能識
覃衆妙蚤以淵源之蘊發為經濟之圖擢貳憲臺絕

震師之殄行越長諫省攄告后之嘉猷譽益重于熙
朝職遂專於武部曳星辰之履姑躋八座之班紀日
月之常即懋三階之績某晚游京轂屢叩門墻竦傳
新渥之頒寔倍常情之喜

賀韓刑書啟

晁子西

伏審簡隆宸扆序陟禁塗畫舜代之冠方期于刑措
曳漢庭之履宜奉于制除有識相趨不謀同慶恭惟
判部尚書神標凝峙仙韻邃清練達本朝之舊章

洞明當世之先務學皆探賸本胷次以推行方足應
機至目前而迎解早膺親擢久列從班疇公望之最
高屬憲曹之建長果陞華于八座併潤色于九章蓋
自元豐之正名初復六職以至大觀之定令始顯一
司茲得全才肆兼重任某猥縻印綬阻叩門墻雖頌
歎之彌勤願編摩之尤拙

賀廖工書啟

何子固

伏審益注凝流晉班史履百工皆聖所作必疇創述

之才八座非賢孰居宜被褒遷之渥師虞允穆朝序
益清恭惟判部尚書有經世之學守之冲深有華
國之文將之質厚告猷東掖納王命以回天執憲南
臺簡帝心而易地肆佩龍淵之錫寔膺鳳沼之除將
見技巧維新自元成而漸及規摹更遠至周召而迺
留由階以陞可拱而俟某台丞巖邑早趨倚于龍門
通守海邦比拜違于烏府逖傳新命倍激孤衷頌歎
彌勤編摩曷旣

賀王中書啟

范致能

寵隨龍馭榮陟鳳池當風雲感會之時復天地交泰
之象傳聞四海歡喜一辭竊以國步多艱方撥亂而
反正仕途久壅當為官而擇人况中書政事之原乃
天下根本之地有德在位斯民舉安恭惟中書相
公學贊皇猷才全王佐直方大以求諸已安平泰以
濟斯民洗光咸池親逢盛旦宣威沙漠定策元勳眷
注益隆譽望彌著某刻心盛德翹首下風附驥尾以

無階賀燕厦之有託仁者在高位已符孟子之言聖
主得賢臣願奏王褒之頌

賀范中書啟

晁之道

顯膺中詔晉陟西臺歡聲所加和氣自應恭惟某
官博大高明直方敦裕必欲致主唐虞之上固將立
名夔契之間秉節不回堅如金石盡言必效應若著
龜乃自江湖復歸廊廟惟一人睿意之攸注與四海
公議之所歸共期更化之成惟恐登庸之晚果敷龍

檢爰步鳳池方且畢慮盡忠同心協德政圖于寔不
必高明之拘法唯其時要以安民為本事還舊觀人
蒙更生故于朝夕之間以格天人之應興滯補弊宣
王所以康兆民壞植散羣太公所以報明主仰聖哲
之相遇揆詩書以同符上帝於焉博臨萬世以之永
賴某猥以頑蹇厚蒙眷私方萬物同慶之時日一介
有成之日矧摧頽暮境已窈哀憐而孤憤愚忠尚思
龜勉雖阻趨于門仞已坐竭于情誠歡抃發中敷陳

罔既

賀中書王侍郎啟

晁之道

伏審入覲天光薦承帝制亟從真館進陟西臺乃願
政事之本原宜歸天下之名德既賀明良之會遂觀
調燮之功伏惟慶慰恭惟 某官賢為時生畧不世
出剛方邁往之氣足以聳動搢紳英偉博通之才足
以酬酢事變富以孔孟道德之學眩于商周盤誥之
文故論思獻納之規獨高乎從橐而啟沃謀謨之績

見紀于廟堂恥媿要以幸容寧感激而遽去至言既久而彌効忠節欲蔽而愈光果錫寵靈還登輔弼恭惟聖主選衆起公之意與夫嘉生仰德望治之心必當加踐平昔之言期以盡收太平之寔惟因時而循理足壞植而散群願茲休功有待今日某被眷維舊受恩最深自欣投老之期獲覩登庸之盛

賀中書何侍郎啟

劉文潛

伏審聖朝選衆帝制褒賢密貳中臺寔當右弼積勤

廊廟已高網轄之功深簡天心遂付機密之本伏惟慶慰恭以某官端靖忠亮博大疎明學術淵源陋兩漢而不數文章爾雅追三代以同風行高而能濟以寬才大而不失乎正凜然風節一於險夷茲見古人之有才是謂大臣之以道自登公輔益著賢勞立名夔契之間致主唐虞之上果間寵命增煥爾同摠庶政之源益茂謀謨之績正具瞻之地更觀調燮之功某猥以疎愚久塵委使方風馳于窮蹇獲遠聽于

吉音莫殫賀履之誠徒有陰雲之幸

賀中書林侍郎啟

汪聖錫

顯被制書進參機務諏詞臣于鼇禁訂國論于鳳池
縉紳管聞中外交慶恭惟中書侍郎懿文華國直
道致君以淵雲之學自名一家以晁董之才親承大
問始終全節被遇屢朝踐揚皆極于華資圖任悉歸
于黼辰繇北門之猷納總右省之幾微深微不世之
姿洞達當時之務靡勞施設足見猷為方將沐浴于

和何以揄揚于盛德永垂方冊屬我宗工某一走門
墻六更符印忽驚流落獲於陶鎔倘蒙託于衰殘尚
少圖於奮勵其為忤悃倍萬常情

賀中書劉侍郎啟

邵澤民

伏審詢求元德協贊萬機撫熙洽之隆方當接千歲
之統盛繼述之烈宜得不二心之臣與參政事之本
源益廣聖賢之事業應為協氣格於萬方恭惟某
官博大而宏通高明而惇裕學洞六經之閭域文雕

萬寶之英華自為岸序之游已積公輔之望丹鳳芝
草寔為聖時而生美玉良金必名清廟之器遠逢真
主亟服禁塗儀刑特簡于淵衷論議必當于帝意果
協明良之會進居綱轄之嚴一德弗渝百工惟叙遂
付機微之本益觀經濟之功方當壞植而散羣何止
興滯而補弊是惟天意願豈人謀某曩以狂愚自干
罪戾賤嗜貴獻情寔靡他綆短汲深言則甚陋豈不
甘齋志而沒又懼傷知人之明大明燭天盲不見日

青陽生物病獨違春願知己之門墻曠問安于時序
腸九回其未已夢中夕而猶驚敢言形跡之已踈尚
冀精誠之有感倘蒙施恩不報之地為一引手已墜
之淵神若巫咸端能再造身同徐甲真遂復生悵方
窘于抱關慙莫諧于望履側聞字號倍極懽悰自欣
投老之年獲覩登庸之日詎止餘生之有託方與萬
物以同榮喜抃發中情誠並竭

賀中書王舍人啟

晁之道

伏審前試大筆峻貳蓬山繼服上恩遂司誥命蓋無
前比可謂至榮吾道用光有知相慶恭惟 某官涵
養異稟發揮斯文探唐虞之淵源脩高古淳和之氣
攬班馬之光彩極瑰琦彬蔚之姿予以用之無不可
者當始進而不偶蓋天畀感情憂思以激其能逮一
鳴之可驚故人皆咨嗟歎服而謂之稱諒從西掖進
直北扉不越期年即登台輔某少嘗有志晚迄不逢
猥以狂言亟承誤獎貧兼百疾老萃千憂學即廢而
遂荒文寢衰而愈下惟觀騫翥足慰窮愁願趨慶之
無階獨激心而有感

賀中書傅舍人啟

祖澤之

伏審膺被宸寵典司帝謨凡在縉紳之間忻逢除目
之下竊以文章治道之鼓吹誥令朝廷之羽儀因人
發揮為世風采若才子遴集則勛華之典粹醇議臣
奮登則高周之書灝噩照爛往冊驚傳後人茲迨以
還貌未足紀惟嚴徐枚賈之于漢及常楊元白之于

唐猶馳駿聲僅躡遺躅於穆盛旦夏尋古初下啟西掖之居仰模紫垣之耀豈止演明賞罰之罰蓋以梯媒疑丞之材自非宗工曷副宏選恭惟某官器兼文武學貫天人志雖毅正而所履融和外則敏強而其中易直久禩宸衷之闕雅結淵衷之知宜渙恩靈遂陞禁近某寓名天祿屏迹東溟第增聆命之歡適阻造庭之賀其為瞻係無任悃誠

賀中書葉舍人啟

蔣穎叔

伏審司言西掖易地東闈朝廷用賢則榮益盛明時之羽衛播紳有德者進尤為治道之光華伏以某官行中表儀學通倫類言語妙于天下知畧轉于上前金玉乃心冰霜其操自致功名之會親逢睿聖之知入直螭坳簪筆以司言動進遷鳳閣緣文以贊賞刑蹈仁義之夷途輸忠嘉之微志宜在昭世蔚為良臣某初聆詔除方切歡歎遽蒙函翰倍懷悚惶屬居守于窮邊顧弗先于尺牘其為瞻係未易究陳

賀中書洪舍人啟

熊子復

伏審簡自宸旒擢居禁掖以辭林之傑而入掌於除
書以朝路之良而進陪於基命當令翰墨所載將與
典謨並傳何幸斯文有光今日竊以元豐外制之職
乃歸舍人紹聖宏詞之科以待文士然而居是職者
未必擢于辭級登是科者或不陞于制垣邈前後以
相望曠今古而一過恭惟中書舍人道大而體粹
才高而氣渾空逸步之馬羣長橫飛之雁序手決雲

漢時既掃于粃糠世掌絲論文自成于珠玉惟茲九
試果遂真除獨高西省之聯兼寓北門之直操淵雲
之精筆妙墨攷昔無儔管秦楚之堅甲利兵庶今有
助某猥拘原隰逖望門墻但竊欣于得輿莫趨慶于
成厦掌帝之制已潤色於皇猷秉國之鈞即彌綸于
庶務

賀中書蔣舍人啟

綦子復

伏審妙簡宸旒真除禁掖以辭人之伯而入掌于贊

書以儒者之宗而進聯于端尹增光典冊竦動縉紳
竊以中書政事之原播告必資于大手元良邦國之
本弼諧允賴于正人匪卓冠于清班曷併膺于華渚
恭惟中書舍人詹事規模閱遠蘊藉醇深文陛奏
篇才已高于晁董史垣載筆法自過于荀袁久已攝
于訓辭果遂正于國任風雷鼓舞既專美于絲綸日
星光輝更助成于羽翼某依仁已久去德猶新逖聞
成命之頒寔倍常尋之喜掌帝之制方並寵於金鑾

東國之鈞即進陪於玉鉉

賀中書錢舍人啟

謝子山

伏審膺被寵光典司告命真賢彙進公論協同竊以
王者擘萬里之微制四海之動曉致治之意必鼓之
以文辭成有為之功必先之以訓教唐虞為盛溫潤
著于典謨高周甚隆詰曲形于盤誥故惟文章制度
之美寔賴修飾討論之才伏以某官德性茂明道
心冲遠嘉言讜議極天人精祲之微殫見洽聞該國

家表裏之要上心素屬輿望所符矧惟專對之勤宜
正代言之選某首承謙眷特貺筆牋感頌之私編摩
罔既

賀中書范舍人啟

任子方

伏審被恩黼座進職綸闈賢哲彙陞僉俞協慶竊以
王者之鼓舞天下必資名世之微言儒士之優游禁
林久號古文之精選洪惟前代具述彛章溫潤著于
典謨唐虞獨盛詰曲形于盤誥高周繼隆闡揚道德

之淵源烜赫古今之視聽自非偉俊孰副討論中書
舍人德履純明道心冲漠決科發策極天人精授之
微削草抗章該國家表裏之要上心素屬輿望所符
矧已載筆于殿坳宜亟贊書于心掖未遑修賀先辱
流音仰服謙冲彌增銘佩

賀中書呂舍人啟

伏審顯被制書寵升禁掖伏惟慶慰伏以 某官本
深未茂器博用周親逢郅隆奮起鴻學遊麗正圖書

之館歷奉常禮樂之司露囊而論典刑簪筆以記言
動耿耿惟憂于國計訇訇益大于家聲既持一意之
堅尤重重瞳之眷果繇近職入直紫微汲鄭論思寔
漢庭之羽翼常揚潤色為唐室之光華某叨聯從班
每瞻眉宇慶此得賢之盛形于聞命之初賀牘未遑
謙勝先辱懷感悰而欲布頤濡賴以何能

賀中書陳舍人啟

王履道

掖垣虛位久篋異才宸綽踈恩茂膺真拜由左史之

高選升西省之清班成命甫傳有識相賀伏惟慶慰
恭以 某官高文瞻縟邃學淵源筆參造化而宛繼

前芳腹貯經綸而可當大任不勞追琢璠璣為希代
之珍少假壅培杞梓成合抱之器誠家學之克肖偉
世業之能承譽已滿于寰區眷尤隆于正佇願蜀川
秀美世不乏於淵雲矧漢詔丁寧才正資于賈馬採
于已試何待旁求咸稱詞苑之得賢愈覺皇朝之增
重某逖聞新渥喜濫卑踪屬坐守于郡符阻走趨於

賓閣

賀中書陸舍人啟

顯膺宸命進直掖垣於簪筆代言初陪法從之列然
瑣窗批詔妙極儒生之榮矧選授之才堪凡聽聞而
心服恭以某官天資渾厚心術高明卓然公輔之
才加以聖人之學文章爾雅追還三代之純議論正
平多識累朝之舊早參依于日月中流落于江湖時
之居易之忠精帝憶仲舒之簡古聞釐宣室結知無

愧昔人起草明光能事更看于他日某銜恩未報去
德猶新前詹大廈之光方懷阻澗忽返故棲之地皆
出生氣成候清和論思豐暇願保節調之適仰承眷
注之深

賀中書鄒舍人啟

趙承之

光奉上恩榮司外制望隆朝野歡動縉紳伏惟慶慰
恭以某官擇乎中庸好是正正文彬彬而濟質志
蹇蹇以匪躬知無不為蓋官守言責之故義之所在

寔忠臣孝子之心揚于王庭想見風采曾賜環之未
幾以詔書之屢遷矧詞掖之秘藏預正機之密勿豈
獨高盤周誥專渾灝之文章抑亦堯咨舜俞脩清簡
之顧問得公為重允帝之求某獲綴班聯猥承眷好
蒙貺書之甚寵愧占謝之不勤陞遠堂高願篤協共
之義松茂柏悅私懷不寐之誠情形于言書不盡意

賀中書梁舍人啟

右某啟伏自拜恩已嘗申賀恭惟舍人壺冰峻彩

巖電英標稟秀氣於岷峨振雄名於京洛學惟覩奧
入聖域而已優辯可離堅占議圍而無敵品格素高

于月旦詞華早揆于天庭爰自先朝便升清貫內佐
計相外剖使符體寬大以布詔條用文雅而飾吏事
坐堂聽訟克播于歡謠視草求才果膺于急召爰九
重而肆覲見萬乘以垂知宣室前登問鬼神于前席
禁林試可給筆札于尚方一時之紙價頓高翌日之
絲言荐降南宮卧錦既改七兵之曹西掖判花便裁

五色之詔將啟迪于帝載寔焜耀于儒林平奏議于
省中佇神明于唐制頒號令于天下固誕布于堯言
三代之風不日而復某聲塵無取名輩相遠偶諧附
驥之誠亦在續貂之末幸依先覺必免至于面墻怯
見大巫已自甘于閣筆然得親于蘭室須強厲于鈇
刀願函丈之有期忽尺題而為貺仰荷勞謙之旨愈
增反側之懷內省庸虛何以克勝

聖宋名賢五百家播芳大全文粹卷五十終

